

遂  
初  
堂  
詩  
集

遂初堂詩集卷之十五

臥遊草

巳午歲交和宋文森韻二首

萬事叢殘爲逼年此身散誕只翛然  
欣看烈雪嚴冰後仍有光風旭日天  
村墅幸畱佳客住僕自林信人住予家度歲霜髭  
慚試彩毫鮮丹霞龐老俱難得坐對蒼松與說禪

休論菌朔與椿年隨分逍遙得自然  
任我探春鸚吹地從他踏凍火城天  
勞農栢酒家家釀索賦梅花樹樹鮮  
誰信團圞無別事白牛分歲學枯禪

師子林稊飲分得崇字

夙心慕奇勝萬里探孤筇寧知巖壑趣近在高城中師  
林古名蹟篇詠傳羣公亭臺屢興廢水石仍清雄一地  
裂數闌締構爭人工天巧落崎士屋角藏千峰峰峰盡  
皺瘦穴穴皆嵌空長袖舞軒舉介圭植端崇離離笋解  
籜獵獵旗翻風危崖屢側度窈洞時旁通如行武夷曲  
似入黃山硤山遊每獨往快此多朋從佳辰值元巳地  
主得仲容英彥畢來集叅差類賓鴻或緡緡素帙或撫  
蚶螺松清言接鹽鹽雅詠聞颯颯而我獨矯步窮搜石  
玲瓏唐臣甲乙品宋帝名爵封榮華一轉眼飄落荆榛  
叢讓此萬玉骨安棲匠門東文士餐秀色逸民討幽蹤

吾哀思臥遊繪山響絲桐何如一丘壑攢簇華與嵩小  
山善招隱桂白兼梨紅願偕北郭友數訪青螭翁

題逋菴師畫紅梅

逋公標格似林逋愛寫孤山樹一株老幹紛披花約爛  
幻中香色有耶無

雪泥鴻爪不尋常曾作天花擁講堂移向清溪蓮漏裏  
金繩寶樹共低昂

題方歐餘畫

一片南湖影熹微潑墨間樹濃渾拂水雲濕欲藏山待  
鶴虛亭立衝鷗一艇還人生忙底事天地本蕭閒

題穹窿神應圖澗上先生筆

天人本一氣何曾隔形軀精誠倘專一感格理不誣世人散亂心諂曲非一途已誠則弗至謂天高難呼丁母天下賢慈孝以相夫自痛鞠子艱旁求良家姝櫛沐使視寢祝之生夙雖穹窿高萬仞上有鈞天居飛章奏紫庭丹誠動雲衢石麟果天與一產來雙珠夢卜旣協兆日辰亦同符操券信可必吹葭候不渝苑枯絕續間轉移在斯須拳拳此寸心可奪造化樞吾師慎筆墨作斯記與圖非惟闡懿懃亦用策屛愚努力致千里渥洼非凡駒

題李武曾灌園圖

若昔將文耨吾嘗以筆耕何如真學圃可得遠藏名種  
美秋多穫泉豐渴不爭一鋤相對老猶喜遂平生

題朱竹垞簑笠小影三首

誰喚羊裘人來親太微座有脚不得伸歸向秋江臥  
已呼漫叟作伴更拉天隨去來不識人間機事海鷗那  
得相猜

秋涇水與穆溪連十里樵風掛席便不用到門煩剝啄  
相逢長在荻花邊

寄題錦溪堂

幽人家住莫釐陽別墅仍聞傍石梁映檻芰荷香早露  
拂犁梗稻熟新霜書縣牛角隨時讀身臥花源與世忘  
江北江南帆一片故園松菊不曾荒

題徐虹亭洞庭游草

我浮消夏三月三君登縹緲九月九江山不著兩閒人  
世間好景多孤負君嘗怪我不爲園我園在山無藩垣  
我每嘆君不作畫君畫在詩饒變化古來何處有仙真  
畫是移家避俗人與君拔宅包山去萬橋陰中好結鄰

畫蘭八首

昨夢湘江岸幽芳帶露餐朝來開畫冊本本是香蘭

本是深山種偏於君子親尋常沒骨體誰敢與傳神  
故人胸萬卷不肯踏京華濯魄冰壺裏丰標如此花  
有露香偏遠無風態自奇憑將獨立意寫取出塵姿  
畫蘭不必似似蘭畫亦好似與不似問月華映池草  
在砌愁零落當門畏剪裁移根墨池裏無苑亦無枯  
密密復疎疎斜斜復整整分明姑射山自寫風流影  
我坐維摩室天花掃不開君能作清供寫贈一枝來

酬周漢荀見贈之作

野人獨臥焦先廬漁獵不出數卷書如蟲啄木偶成字  
以淹雅薦誠相誣上林青蔥萬玉樹那少輪菌檮一株



拙鈍生來不可療方木爲輪枉破觚一朝去國猿脫檻  
荷衣蕙帶還吾初幸無冰炭掛胸臆溪花園鳥皆堪娛  
遺名懶上釣臺釣觀化欲入壺公壺圖書蒐羅蠹蝕後  
碑版捃拾雷轟餘遠遊長著康樂屐近出但坐堯夫車  
詩文多病亦懶作不堪心膂重雕劊汝南英髦才蓋世  
鯤鯨跋浪驂驅趨未升彤墀侶鵝鷺且屈田舍親樵漁  
豈惟金針撥童稚實藉砭石攻蒙愚君才堂堂萬人敵  
蠅聲蚓竅不足奴枉遺佳篇見推許塗澤魚目當驪珠  
兼愁史書無定本家鈔野纂人人殊謂余粗曉著書體  
及時撰次真良圖此事吾家有根柢續成雅志不敢虛

蓬山奮筆豈無意其奈時命相齟齬家居無書亦無友  
欲共此事其誰歟感君策我識途馬壯不如人老益驚  
君之筆力足扛鼎畱心典故班班如願更討論史義例  
貴挈綱領刪榛蕪他年玉堂勤載筆勿但碌碌消居諸

壽王東筏

識字今人苦不多輸君鐘鼎遍摩挲策知顯節陵中出

東筏

文辨成臯印下訛

馬援

樸學世輕心獨苦耆年文

與鬢雙皓辛泉書在終遭遇汗簡千秋定不磨

元楊桓號辛泉

著六書統其于上之朝命浙江行省刊行東筏著六書勺尚未刻故以此爲祝

吳聖玉歸自遼左志喜四首

夢想流人紫塞邊  
每依鴈候祝南旋  
不圖真有珠還日  
始信非無瓶乳年  
人痛嵇康懼橫天  
天哀李燮予生全  
鄉音無改容顏肖  
破涕應知慰九泉

挑燈絮語重迴腸  
三十年來噩夢長  
熊虎窟中延弱肉  
雪霜窖底漏春陽  
一官可博終懷土  
萬事無營只望鄉  
人願旣堅天必遂  
網開一面竟高翔

數行墨牒隻身歸  
歎息家園事總非  
門巷凋殘餘燕壘  
親朋零落半鶉衣  
難尋手澤書千卷  
且拜荒阡樹十圍  
野老村童爭擁看  
烏頭能白世間稀

同難當年數十家  
盡於邊地化蟲沙  
羨君獨返令威鶴

有幾能乘博望槎轉念阿咸淪絕域久無黃耳到天涯  
可能亦有生還望枯木從教再作花

送聖玉再往遼左二首

鱸魚正美菊花明何事歸人又北征關塞有家當挈取  
資裝未辦尚經營脫驂我自慚平仲分宅人寧讓邱成  
燕趙男兒多俠骨可無傾蓋贈平生

養就針鋒解指南重溟來往片帆堪不妨刻印還銷印  
一任朝三與暮三時有不準納贖之信劍到波心終自躍珠藏龍  
領定須探病夫待爾歸來早心史相將訪鐵函

題宋中丞牧仲西陂魚麥圖

荷田田蘆芊芊蒼陂一曲清且漣  
醫泉不動魚正樂鵝鶻引子鳧  
鷗眠沼陂稻畦似碁布平橋野屋  
相連綿黃雲覆野麥初熟秧針出  
水齊於瓊長楊踈地松逵逕浮靑  
撲翠柴扉邊中有一翁神翛然蒼  
顏玉骨如胎仙高情獨立萬象表  
意遠迥在邃古前得非賀鏡湖無  
乃王輞川宋公自言吾家古埵澤  
陂塘十里瀦清淵舊饒菱藕富魚  
稻課耕學圃堪窮年無端出預人  
世事纓冕羈絆歸無緣作圖置我  
林澤裏會當跋足謀終焉知公此  
語出肝鬲難進易退真古賢世人  
盡銳復賈勇百尺竿頭未息肩  
都緣可貴不可賤素衣化緇茅  
易茶公惟恬

淡矢一節流行坎止總任天以茲永砥清白操松貞玉  
潔老益堅但得心閒與政簡綦戟何必殊林泉鄧尉千  
林梅似雪巨區萬頃蓮如船豈獨西陂好行樂祝公莫  
賦歸來篇

壽蜀藻宗兄二首

雄長詞壇五十年靈光無恙獨巍然天畀文獻凋殘後  
人溯風流正始前草市兒童知姓氏蠻方卉布繼詩篇  
軟塵不踏長安陌自在龍眠頂上眠

放鶴籠鷺與味長九松相對晚蒼蒼林宗巾角看常整  
弘景瞳人轉漸方兒購異書當彩服客徵奇字引霞觴

頌揚弱弟無才思漫點魚箋細作行

括蒼姪請  
余作壽序

壽景初上人

赤髭無恙舊參寥雪後孤松老不凋懶向山頭拈白拂  
貪於林下住團焦六時蓮漏諸賢集九品金臺一念超  
元亮近來能止酒幅巾人社不須招

和宋中丞送兩公子槩諸孝廉赴公車十韻

二妙探珠早羣英養翮成駿從天策試耜向玉田耕江  
樹繁帆影旌門集履聲宏開公府讌寵餞計偕行經濟  
談同甫天人對董生男兒饒事業人世重科名丹地敷  
求切綸扉藻鑑清拔尤多士服奪幟萬人驚瑞采看東

壁佳音眇斗城藥宮名已定禱祝盡朋情

聖駕南巡蒙賜御書賦謝

炳煥奎章妙入神寵頒何幸及微臣展開奎壁生光耀  
懸出龍鸞動翼鱗餘藝日新窺聖學雕鐫行遠藉貞珉  
天球不是尋常賜畱作山家百代珍

題喬無功兼葭書屋圖

經生未一鳴寧免學干祿迨其旣登第世故紛馳逐孝  
廉仕隱間學殖宜富蓄利名一相親頓疎此卷軸喬子  
經世才恬淡性乃獨公車嘗懶赴嗜學如嗜慾別墅城  
東隅蕭疎映花竹先世多藏書盡發以佐讀意得忘眠



餐情深到歌哭此味不可分此樂無時足老氏有至言  
虛心而實腹髯乎洵絕羣百鳥中一鵠射湖波鱗鱗珠  
光寒可燭褰裳往從之伊人美如玉

送某庶常改補縣令二首

詞林盛儲才妙選書升秀良金更陶鎔德業期造就  
書一藝耳旁觀便筆受奈何用程材殿最以此奏之子  
華國才鑿坡早騰驟移病十載餘著作等身富起補入  
承明文筆推領袖翻譯非所工毫釐能無謬坐茲遂左  
官新綸改除授同庀四十人聯翩去朝右青藜嶺無輝  
志士爲心疲剪舌教籠鸚豈施鸞與鷺翻經羅什能誦

責遷與壽何當修六典太史職遺舊不侵象胥官一洗  
蓬山陋

人臣服官義出入勞宜均宋時元魁選竝令官親民俟  
其著聲績乃召侍從臣欲令曉吏事然後垂朝紳此意  
亦良善乞外古有人君今宰百里雖屈道亦伸有民而  
有社盤根試風斤可以樹德惠於焉展經綸勿厭簿書  
冗勿苦俸入貧勝索長安米瘦馬衝紅塵勉哉砥清節  
堅白無淄磷佳政一以立令聞當日新三秋可報最重  
看上楓宸民情與國計娓娓前席陳懸知玉堂侶練達  
無公倫

次韻酬宗人兩衡見贈二首

佳客來欣慰，索居况逢宗黨締。交初才高獨驟，渥洼馬

遇蹇，還乘薄笨車。祖德披陳青史外，

兩衡之高伯祖鍾高祖鏡曾祖子正

竝以直言顯名正嘉間

先蹤撫摠劫灰餘，似君淹雅淮南少。撰述

應知書滿廬。

孤筇歷盡萬峰奇，霍嶽瀛山恨未窺。地主幸逢瓊樹秀，

游裝拚損草堂貲。博儲簡牒憑徵事，淨掃巖屏待勒詩。

割贈雲腴供嘯詠，

贈以水巖硯一

長城誰敢撼偏師。

題程偕柳兄弟讀書圖

機雲舊說東西屋，求點曾誇大小山。何似擁書秋樹下，

一林霜葉映衣班

題臥龍松圖

黃山臥龍多怪絕，偃地蟠空枝百折。就中繞龍松最奇，孤峰獨樹相纏結。松根透入峰中心，危柯冠頂如華簪。修幹四垂龍躍爪，微風過處聞龍吟。石笋竝頭我曾駐，愛此婆娑不能去。何人寫此懸高齋，赤松黃石如重遇。始信峰頭接引松，虬枝跨壑如長虹。竒姿絕景能圖否，著我逍遙一老翁。

遊東洞庭俞塢諸寺二首

開披圖志考峰名，風日佳時結伴行。登嶺全湖呈海勢，

穿松一水作琴聲  
煙村冷處山偏秀  
僧院荒餘境轉清  
櫻筍家家畱客便  
新茶正賴活泉烹

名藍古蹟每多奇  
徧剔莓苔讀舊碑  
塑像工如阿育造  
繪圖妙似虎頭爲  
松關坐久禪心遠  
竹榻談深日影移  
天與清遊須勇決  
來朝晴雨亦難期

題吳幼平秋夜讀書圖

秋山淡淡秋林瘦  
紅葉蒼藤錯如繡  
誰貌幽人冰雪顏  
秉燭攤書夜如晝  
幽人家住莫釐陰  
松風洗耳泉洗心  
趨時未甘競巧捷  
汲古不厭窮高深  
北游京雒曾連騎  
朝過西園暮東第  
飽看變態甫歸來  
益信讀書真有味

金庭自昔列仙居，短棹相將興有餘。  
直造龍威仙隱處，窮探神禹玉函書。

宿西洞庭明月灣周觀侯貽詩問訊依韻酬之

勇游不憚湖行險，一艇衝煙宿雨餘。  
見月懷君初把盞，阻風念我遠馳書。  
吟依瘦石心同冷，臥傍寒梅影共疎。  
絕壁小舟貪夜泊，一生情性子瞻如。

題王氏明秀閣二首

閣湧林端當一峰，全收湖態與山容。  
雙丸躍出銀濤濶，萬笏浮來玉壁重。  
盡日捲簾看畫障，清宵吹笛喚魚龍。  
毛公綺季今何在，只合雲車此地逢。

雜花圍屋竹藏門避世秦人自一村豈可導游無地主  
絕憐解倦有芳樽天將風雨淹吟眺人與圖書恣討論  
石丈締交差耐久卜鄰便擬刷雲根

題撫松觀瀑圖二首

獨往千山抱一琴不從塵世覓知音胎仙能舞花能笑  
會得成連太古心

一派銀河落九天知君坐對欲忘年科頭我亦匪廬客  
盡日眠雲看疊泉

老馬行呈澤州相公

山阿老馬久廢閒飲泉齧草坡陀間騰驥無復千里志

疲牛逸鹿相追攀，忽逢孫陽爲太息。此馬權奇舊曾識，  
年齒雖長毛骨殊。剪拂猶堪愛銜勒，欲重引入內廐坊。  
差肩赭白斑，乘黃豈有懸金市。駿日而令老驥遺道旁，  
感君至意徹心髓。仰天長鳴朔風起，深山廣谷粗識途。  
分合前驅報知己，其如羸老筋力枯。精銷銳鑠非故吾，  
不能邊塞效馳驅。詎可天閑糜粟芻，只今龍駒滿沙苑。  
一一追風與躡電，單騅匹駱何少多。鑿蹄未若施繮便，  
多謝空羣顧眄恩。搜揚高詒動乾坤，放教舒足眠豐草。  
絕勝籠頭入禁門。

澤州公有鶯脰湖見懷之作依韻奉酬



春禽多善語出谷愛新鶯坐樹翻躑態穿花宛轉聲金  
衣翻日麗翠脰掠霞明碧水渾同色涇湖久借名涵天  
雪練淨貯月玉壺清篔簹浮家在蓬蒿小隱成硯臨新  
漲洗笛向遠山橫仙棹欣停旆寒潭正濯纓箋題蒙枉  
寄歲序悵頻更尚惜孤飛翼無令世網嬰苔磯容獨占  
尊味有誰爭剖玉情雖重鏘金調莫賡權歌隨欸乃漁  
唱雜嚶嚶縱入伶倫耳難教叶鳳笙

陳虞佐北行有留別之作依韻和之二首

宣力抒華貴壯年亨衢喜爾著先鞭多時璞玉光埋篋  
一夕干將氣燭天報主正宜鋒早試辭親無惜袂頻牽

探珠驪頷男兒事，眇望佳音取次傳。

能成宅相有餘輝，送遠無煩別淚揮。  
執簡紬書吾亦勇，摧幢發軔事相違。  
裁成遠札因風寄，望斷征帆挾雨飛。  
合劍還珠憑料理，玉關人老酷思歸。

送朱漢槎遊嶺南四首

梅花百詠賦初成，放棹旋爲嶺外行。  
便入羅浮坐香海，不須鄧尉拾殘英。

章江湍駛粵江清，夾岸峰巒畫不成。  
揮灑定知多變格，天然粉本勝關荆。

嶺南耆舊悵凋殘，古調朱絃誰與彈。  
猶有藥洲詞伯在，

梁葉 憑君傳語勸加餐

浴日亭曾兩度登壯心垂老尚飛騰探竒好宿孤峰頂  
雪浪排山看躍鵬

題施翼聖東荒田舍圖

草舍三間絕世塵古松修竹自爲鄰恰于寂寞寬闊處  
著个嶽寄歷落人

稻車秧馬莫嫌忙菘飯菘羹意味長只恐爲農不終了  
爲農端的勝爲郎

同學余翀子遠來稱壽詩以謝之兼祝其來年七

麥二首

總角論交到白髭松筠玉雪共襟期三年賙望來何暮  
千里尋盟樂不支好句探囊憐爾健名山圖壁歎吾衰  
親恩未報身空老慚愧賓朋勸壽卮

齒角乘除物理真莫嗟淪滯莫嫌貧請看朝市空花相  
何似林泉現在身燕翼兒孫憑處厚維持風俗要還淳  
長椿古櫟知難老畱作香山白社人

題徐虹亭豐草亭

松風書屋屋似船楓江漁父船爲屋已稱亭長占垂虹  
更結茅亭傍城曲亭無壁落延空明草不剪茨存素樸  
一泓之水碧澗縈尋丈之山怪石簇簷前老樹作晚花

牆外新篁借濃綠橫石爲几琴堪彈支木作牀書可讀  
豈無鳳巢阿閣中拖紳委佩多拘束豈無華堂廣陌頭  
繡拱璇題勞刻斲何如草亭製簡古爲之不費成之速  
不藏一物忘機緘不受一塵暢心目亭中之人見事早  
半生占斷清閒福炙轂脂車



忙晏坐清吟百年足

題王石谷畫

石谷堪追白石翁紛披老筆簡能工詩人一段蒼寒意  
正在疎林瘦石中

壽陳元一姊丈二首

情親四十八年前並硯分燈事宛然

余年十四卽與君同學

急難

鵝原肝膽共結鄰綺里陌軒聯雲煙散後山容淨蒲柳  
凋餘栢幹堅衰齒幸同強健在羨君鶴骨正踰躔  
十畝桑麻環堵居醇醪佳茗夙能儲未衰早已傳家政  
垂老惟耽讀楚書德耀案邊偕老日陽元雲路奮飛初  
長幼新登科  
入纂修館散人亦有林泉樂無累無營遜不如

題楊湘城深山訪道圖

古松離奇傍絕壁飛梁跨澗懸泉白磴道盤空一千尺  
中有獨往之孤客冰霜顏容石骨格一筇飄然躡雙屐  
勇探猿巢與虎窟千峰萬峰恣搜歷不計歸程與來迹  
問翁邁往何所求日空世事如浮漚味道聊爲採真遊

巖棲谷隱多高流，欲往從之論玄幽。我亦名山健遊者，天台羅浮冬復夏。嗜奇每恨同心寡，他日相逢古松下。玉藥金芝贈盈把。

御書閣三首

閣在南壽明義菴，有宋高宗書。鷹及趙子昂、滾馬圖，今亡。

南遷草草宋思陵，駐舫拈毫尚畫鷹。何似鷹揚歷上將，擧鞬萬里縱飛騰。

王孫懷古此逍遙，滾馬留圖紙價高。輪與開元老曹霸，南薰殿上畫拳毛。

墨妙銷沉不可攀，前賢遺蹟尚班班。甲第朱門幾遷改，長存誰得似禪關。

題綠漪亭

一水抱花村，輕帆直到門。  
溪風秀禾黍，山翠濕琴尊。  
春入禽能語，秋深石露痕。  
灌園吾有意，靜對已忘言。

雙林寺

湖濱多精藍，雙林最深杳。  
地爲蓮瓣浮，水作玉環繞。  
虛堂藏竹陰，古殿露松杪。  
鐵佛浮江來，位置妥而巧。  
一燈久綿延，三災莫能擾。  
經過儼舊遊，佳興愜幽討。  
湖光明可餐，山容翠堪掃。  
几上看風帆，欄邊狎魚鳥。  
禪窟況能詩，畫秀追清矯。  
怡神頴師琴，快意高閑草。  
居然成滯留，豈復厭枯槁。  
加餐粥甘破，夢霜鐘曉佳境過。  
不忘重



來訂非渺鴻飛去冥冥雪上聊印爪

湖塘瞻眺

禪房澹無事逍遙步湖堤沙路高且廣  
雪消淨無泥稠疊接桑壠青黃間蔬畦  
一川爲鴻溝分壤吳東西水齧岸善徒  
舊迹尋還迷古殿與荒廟孤撐色荒淒  
長湖際天白溟漲無端倪疾風駕洪濤  
奔騰千水犀漁舟破浪去出沒如鳧鷖  
兩山我故人三年惜分攜隔湖快良覲  
青林映丹梯高峰戴晴雪訝爾頭白齊  
因風報石公珍重雙猗犁明春會相訪  
輕帆劃玻璃

題楊

補管闕

楊公有臂思補天麾戈莫挽日墜淵剛腸急難嬰世網  
投荒遠去龍江邊同行祁李金蘭友凜冽冰天時握手  
拍肩把袖畫圖中連根共蒂難分割偶然剪裁畫臂虧  
真臂隨痛百不治剪紙續圖痛旋愈神功妙力難議思  
乃知萬事真幻同精誠至極能感通嚙指心痛稱至孝  
斬衣見血聞孤忠楊公一臂尚如此義膽忠肝知不死  
移山填海一生心未補未償心不已

題宋蘭揮潯陽送客圖三首

白傅襟懷原曠達江州山水最清幽無端逢著京都女  
撥動遷人萬里愁

長歌舊愛挑燈讀小卷  
新看潑墨成一片蒼寒蕭瑟意  
如聞絃響與江聲

我亦潯陽暫泊船  
佳廬秀色落尊前  
憑君更倩荆關手  
畫出層峰挂瀑泉

新安畢叙九尊祖楸於塞外歸葬故里嘉其篤孝  
賦此贈之

松山東畔黑江頭  
多少羈魂向月愁  
幾見緜親來子姓  
驚聞抱骨返松楸  
投荒往日寃仍雪  
代戍先人志併酬  
大孝如君真不匱  
定知一節已千秋

遂初堂詩集卷之十六

補遺

司馬相如玉章歌

漢家銅盤天上折劉郎玉璽抵地缺豐碑剝落鐘鼎殘  
幾人名姓青雲揭可憐文園一印畱玉花出土光幽幽  
昆刀刻成四小篆攢鋒蹙勢排銀鈎錢君珍愛逾拱璧  
傳玩千人萬人惜張顛草書玉夾拾一堂寶氣爭磨射  
却憶當年肘後藏凌雲賦筆相低昂失意犢禪共偃蹇  
逢時努矢同飛揚遠山蛾眉玉纖指粉香脂澤猶沾此  
若教掩姓惑東陽猶恐列名猜太史鬢鬢若若豈足誇

大名可以垂無涯君不見爛銅官印紛如麻姓名荒忽  
知誰耶五公七相同蟲沙

訪白菴禪師宿一雲山房作

達人不可世往往臥雲煙白公無俗韻性亦愛林泉獨  
收衆山勝結屋層雲巔我慕靜者妙因來造雲天煙嵐  
倏萬態彩翠相新鮮深壑晴亦雨古花幽更妍朝餐翠  
微入夕宿孤霞連幽篁吐華月高鳥浴清泉長風拂松  
梢萬木號空山雲臥既絕塵高話復忘筌相對欲無語  
夜靜還未眠我本澹蕩人因之俗慮蠲尋源如可再養  
真以盡年

慟哭七十韻

慟哭荒山頭寒風慘淅瀝明發將北還拜泣辭墓側傷  
心原草枯灑淚墳土碧追惟三年事惻愴不堪憶雪涕  
陳梗燹幽明諒不隔嗚呼單闕春吾兄初遊厄颶風揚  
洪濤清晝飛霹靂哀哀破巢下萬事難可測祖先有遺  
眷到今偷視息不死責逾艱苟活罪何塞蟲蝨負泰華  
中夜常怵惕維時北風寒千里凍地坼寡嫂將兩雛崎  
嶇赴塞北逝將徒步送不能憚遠役迴看越州南森森  
見矛戟西陵咫尺路遺骨收不得黃蒿沒故廬遺書復  
狼藉顧惟兄平生著述窮日力精思託篇翰雅志寄圖

籍一朝恐淪落千秋絕遺蹟亮無移山力揮淚且北適  
薊門煙塵黃塞外草根白零丁四千里寒影深夜隻廣  
寧城迢遙淒風苦白日哀哉吾貞嫂畢命於荒驛殊俗  
激清風邊人悚英魄空餘兩孤兒零落窟海嶺死者長  
已矣生者兩惻惻歸來到鄉土長號對親戚吞聲向老  
母五內痛彌劇便欲扶旅櫬還歸故阡陌煙塵正縱橫  
寸步礙荆棘夙昔慕遠游未覺天宇窄五岳思振衣三  
山期挂席擔荷殊艱難側身且踟躕秦坑酷詩書漢錮  
嚴簡冊中郎等身書什百畱萬億光焰未銷毀神鬼護  
蠶蝨時時得航頭往往出壞壁哀集成一龕依然見手

澤一讀心神舒再讀涕泗積爾骸委路傍爾文好何益  
俗士悲首丘壯夫思裹革吾兄江海人寧爲一丘盡延  
陵葬窳博伯鸞瘞吳國魂氣之往來何嘗滯體魄客殯  
古有然渴葬禮自昔未能便歸骸曷且就窀穸西冷望  
吳淞相去况匪逖於焉卜崇岡爰以啓幽宅高原名葛  
仙吉阜惟寶石六橋前縈迴孤山對峯峒岳侯與林公  
引領得良覲玄堂旣潛開陰溝亦雙闢雖無萬家營足  
以樹碑刻雖無千騎送亦有素車客負土得侯芭拊棺  
惟范式徐君莫生芻向子愴鄰笛返背俟他年掩土自  
茲夕悠悠重泉下杳杳長夜卽百年歸一朝萬事盡三



尺魂來不須招魂去不可識有知竟何如無知永寂寂  
遺孤不臨安嫂氏不同域天高誰能呼淚盡何處滴濁  
酒澆一卮麥飯奠一盞手封一坏土手種一株栢從茲  
汗漫游飄然理輕策高攀天門梯遠躡羅浮屐何處望  
孤峰萬里愁雲色

隔谷歌

隔谷隔谷一車兩軸兄居重園弟正蹶踣隔谷隔谷一  
車兩軸兄殺騎馬弟槌肥牛日落天風鼓聲四匝身在  
谷中何山可脫我欲拔劔劍缺摧鋒我欲彎弓弦絕矢  
窮命居刃端譬如石火隔谷不來孰爲救我朋仇一言

奮身相捐孰是同氣而不我憐一猿中箭羣猿啾啾嗟  
爾匪人不我同仇

度關曲

齊謳且莫唱越調且莫喧四坐且寂聽聽我歌度關關  
門峩峩半天起左扼狼山右遼水西連秦王所築之長  
城崩亭破障一萬里春風自古吹不到天荒地老白日  
死江南遷客辭燕京客心夜夜邊風驚一時徒侶皆涕  
零本家江左衣冠族金鞍寶馬人如玉朝遊北阜暮南  
鄰何當遠戍遼河曲遼陽三十六市衛處處天清聞鬼  
哭烏飛一去無還期况乃身無羽翼見拘束只今猶是

中土人明宵知復何處宿鷄鳴笳鼓喧吏人催度關度  
關猶自可却望愁殺我故鄉何遙澤萬里凝愁雲揮手  
謝送者相看淚盈巾猶聞附書歸各自貽六親那知親  
戚復蕩盡可憐寄書與何人邊人向夕吹哀笳哀笳三  
聲雪作花雪花莫沒關前路夢魂從此時還家

答朱長孺

道喪儒服衰讀書爲聲利目未窺兔闌漫言曉大意向  
生鄙章句淵源有獨契陶公不求解亦云析疑義奈何  
今時人流覽取自恣鹵莽對前人微言所山墜先生涵  
古心身世早相棄萬事無所營一編獨肆志家園老寧

窺木榻歲仍弊鄴中十萬卷便便腹爲筍非惟侈博洽  
而還得精詣上搜六籍遺俯貫三唐製旁搜訂謬譌幽  
討晰同異服鄭得爭友顏孔可齊轡賤子亦何知高山  
徒景企胡然不鄙遺託以千秋事愛我情有餘贈詩見  
獎厲永寶金石言庶脫浮名累黃生九叙富文藻近亦究  
經藝何當載醇醴同問雲亭字

己酉冬自淮陰抵平原呈亭林先生六十韻

耆德何寥落人倫孰楷模斯文知未墜夫子實通儒世  
德推江表高名冠海隅才猷鼎簾重器畧廟堂須妙譽  
歸人傑英姿識鳳雛風雲避絕足羽翼礙天衢築版功

名遠躬耕心事紆勞勞悲擊楫渺渺欲乘桴廿載中原

客單車萬里驅北游頻五岳作賦幾三都漢塞雲隨鴈

秦關月炤榆胸中百郡志掌上列邊圖先生有昌平山水等圖結

客傾豪俊論文盡碩厨襟懷小天地聞見溢寰區學貫

天人奧身苞造化樞大文經緯著讜論古今臚賈馬寧

方駕班揚敢竝趨才高道乃弊心小聖爲符雅痛微言

絕深嗟學術殊幾年犁傳注百代掃榛蕪精理通爻象

鴻猷擴典謨禮堂尊講席絳帳盛生徒小子深瞻仰通

家自友于追陪憶往歲侍從足歡娛稽阮交原厚陳雷

好不淪時時枉高駕往往到孤蘆永漏杯同把明燈筆

共濡情深等膠漆調叶比笙竽各矢青雲志祗愁白日  
徂龍蛇夢俄兆鵬鳥識堪吁向子聞鄰笛王公憶酒鑪  
遙知悲宿草無處奠生芻落魄餘文舉伶仃有少孤素  
絃哀絕調枯樹慘同株戢影依慈母含辛對阿奴向人  
言慷慨伏枕淚模糊流浪來淮市飄零客射湖江關淹  
歲月踪跡混泥塗范叔綈袍盡相如四壁無三秋長旅  
食半刺只窮途誰敢題鸚鵡那堪聽鷓鴣壯懷感馬投  
岐路畏楊朱愁到思投筆窮來未棄襦橋寧爲枳變蘭  
不效蕭敷把卷難窮編書亦絕蒲三冬曼倩惜一榻  
幼安俱汲古慚修綆攻文愧小巫孤生原謫劣曲學况

牽拘窺豹非全日雕蟲豈壯夫夙懷期負笈雅志有懸  
弧碩德惟劉董儒宗有鄭盧龍門雖自峻蠡測肯辭愚  
問宇候芭去傳經服頓呼羸糧非早暮命駕敢踟躕汶  
野黃雲凍沂山白草枯隻身經雨雪遠道涉崎嶇捧杖  
微誠遂橫經鄙願輸駑駘還賴策蓬草或堪扶斧削資  
良匠陶鎔付大爐垂恩無以報感激一微軀

太瘦吟贈徐方虎

徐生有仙骨朗如玉山行新詩好風格字字澈骨清哀  
玉憂絃響瑟瑟寒泉溜峽風泠泠苦吟頗類杜陵叟古  
貌人呼太瘦生太瘦不須憎醜老世間何物非瘦好君

不見我脣山峭壁萬丈空青間君不見鏡湖水寒潭澄  
瑩秋月裏百卉鬪穠艷不與寒梅爭菊花傲霜紫竹葉  
凌冬青騏驎健骨霜鷹掌寒蟬吟清鶴唳朗阿環不及  
飛燕妍玉奴何似梅花仙從來書法貴瘦硬顏筋柳骨  
方入聖畫家絕品數倪迂淡墨蕭疎那能竝迄乎詩律  
逾分明陶謝格律矜天成襄陽百篇最清絕少陵老筆  
偏縱橫人間形骨亦復爾瘦質由來稱佳士嵇康骨秀  
饒逸情衛玠神清足玄理徐生家正住吳興隱侯瘦骨  
同峻嶒冰心粲鬢玉壺裏雙瞳爛爛眉紫稜怪道清才  
天付與詩成一一瓏珠吐不然採掇皮膚間那得神姿



秀如許世人相士但相肥披裘五月何人知豐頤白面  
取卿相雞羣一鶴常苦饑徐生徐生勿落拓英雄那得  
常屈螻不聞麟閣畫獼猴看取鳶肩逢日角潘郎短鬢  
只清吟餐霞且上嵩山岑他年白石清泉裏遲爾參差  
鸞鳳音

西郊兩高士詩

西郊兩高士竝舍突不煙各乘肥遯跡蟬脫淤泥間惟  
昔陸沉初儒冠多棄捐搜牢及鬢序張網忽彌天迫遣  
掛名籍不者謫戍邊志士亦悚息身命絕可憐偉哉鄒  
先生矢口吐高言雷霆震昏黑一破蚊蠅喧趙君故慷慨

慨承響如轉鬪欣然共攜手滅跡於林泉終身誦彼美  
使我大節全悲哉此岐路舉足萬里懸驚波須勁柁急  
箭取正絃所爭捷毫毛得喪重丘山冥冥雙紫鴻碧落  
相盤旋獨醒既不易載義亦良難作歌播清風永以激  
懦頑

寶刀行爲夏子宛來賦

并州產利鐵冀北出名馬利鐵作刀名馬騎可以橫絕  
走天下潘郎愛馬復愛刀夏生亦爾真同袍我求二寶  
不得一君乃鑄此爲吹毛管涔山坑采精鐵千日鍊之  
百錘折庚辛日月鍛冶成淬用井泉剛且冽高秋拔出

神鬼驚星芒射地霜花明彈之清長作磬聲去刃三寸  
鋒先迎斷犀切玉無畱行參旗必有紫氣徹子夜宛聽  
雄龍鳴君從鑄此寶佩之不曾離我昨得花驄步驟亦  
殊異爾策我馬我舞爾刀耳風鼻火秋天雙雕雖無青  
虹紫燕亦足以豪我踏霜楓且歸去君戀葡萄行復住  
去住相看欲別難摩挲寶刀爲君賦刀乎刀乎爾不能  
使夏生際風雲持汝叱咤麾三軍掃清六合無妖氛又  
不能摧落俗務遊名山佩汝夜行巖壑間辟易魍魎  
魅之神姦窮年伴汝坐枯壁處女磨針有何益不愁刀  
繡生莓苔臣精銷亡良可惜吁嗟乎羊腸摧輪虎豹多

風雷未至龍爲梭  
駙駙不絡金盤陀  
枯槎泛泛浮天河  
龜山欲伐無斧柯  
夏生其奈寶刀何  
吁嗟夏生其奈寶  
刀何

石壁

石壁不可尋  
滿谷春雲瀚谷口  
一小峰亭亭秀而聳  
山腰磴道窄先登  
競餘勇側裂石嵌  
空倒垂樹擁廬稍  
稍晴雪飛淅淅水  
泉動禪居而蒼巖  
畫屏逼相拱甘露  
無仙壇白牛窠靈  
種獨有夫人禪南  
金世爭重千佛鑄  
金爲象教何其冗  
有客思洪爐竹見  
火雲湧千將截犀  
兕錢鈔耕丘壠曠  
觀世誰同虛令象  
教恐不如盡春醪  
藉

眠草茸茸

藐姑射山

至人蛻天地下與人爲徒亭亭藐姑射乃在唐帝都仙  
者駿飛龍飄飄凌八虛歸來憇高巖冰雪以爲膚雪膚  
長美好春山富瑤草俯視堯禹倫磬折辭大寶帝王亦  
何物坐使羣聖老千秋汾水陽雲濤白浩浩我無軒裳  
累學仙何不早倘遇餐風人蓮花洞親掃

呈亭林先生

尼父志不達浩然動歸思羣材良斐然裁成將待誰  
車訂六籍制作通神祇三年致祥麟大道以不墜海內

有先生人倫之宗師學惟天人貫道乃汗隆宜嚴冬霜  
雪集萬木爲之萎孤根獨巋然知天未喪斯周游遍五  
岳歷覽環三垂天地有大文一一爲搜披成書藏名山  
故里歸何遲下國寡良材斧斤諒難施區區園葵意朝  
陽寧見知何常畏耨去萬里相迫隨秦岱峰崢嶸口觀  
路險巖一覽小天下慰此平生期

黃山歌送孫無言山人歸黃山

我聞黃山乃是玄圃之別仙山之宗環迴三十六蓮峰  
萬靈側塞棲其中璿房玉室自然構幽巖秘洞開洪濛  
簫韶天樂六時奏三花珠樹長青葱我懷靈境未得到

夢泛黃海雲容醒來身在廣陵市洗眼正見披裘翁  
披裘翁家在天部之下齋雲之東高吸沆瀣揮煙虹偶  
然失脚踏塵網一臥廿載迷還踪歲歲言歸不歸去欲  
前復却如驅蛩昔人玄覽窮八紘張帆入海求方蓬黃  
山了了在人境策杖便到非難通芒屨布襪萬里客辭  
官棄家來相從君棲此山看山老掛瓢舊在東溪松  
根菖蒲花紫茸君不歸兮秋露濃青精之飯山家供蔬  
糧不用謀宿春抱琴獨酌樂復樂何須結伴扶龍鍾君  
不還此靈璫兮奚局促乎樊籠江都女兒如花紅清歌  
雅舞垂簾櫳山人布被眠秋窓陶朱程卓誇素封萬紵

車船千指僮山人破帽吟霜楓荆卿已老刺孟窮八千  
君子爲沙蟲一斛腐水無神龍君不行兮奚爲沈吟躑  
躑淹此邦噫嘻志士獨見兮不與衆同乍飛乍伏兮一  
雌一雄凌競寒門簸烈風山河大地盡晦蒙七聖欲往  
逃崆峒君歸何歸兮視天夢夢春非我春冬非我冬陰  
陽水火紛相攻何當曉日光瞳朧晴天萬里消帶棘海  
水浴出金芙蓉洪厓拍手浮青瞳雲耕絳節來玲瓏迎  
汝歸臥三花叢仙潭晞髮摩蒼穹下視世界如螻蛄我  
騎白鹿行相逢吹落瓊藥瓊花宮

送臨洮知府二首



漢家邊衛西州急郡將功名隴右多榆谷只今堪臥護  
蘭山不用更防河嚴城明月寒笳吹古戍秋風靜橐駝  
尚有屯田須入奏營平方畧待如何

去年送子羊城棹我向函關立馬來此日秋風生隴坂  
又看旌節出容臺山經烏鼠雙峰削河遶蘭臯一綫迴  
千載文淵勲業在空巖祠廟重徘徊

建武中馬援爲隴  
西太守威信大著

贈陸冠周

陸生對我慘不樂自言遭命何奇薄阿父辭家已數年  
破寺荒山無住著苦勅家人斷往來况復兵興道途惡  
老母堂前缺甘旨幼弟牀頭困醫藥菜田十畝水浸餘

瓦屋三間火燒却讀書無用類屠龍學劍不成愁刻鶴  
伯叔才名總凋謝簪纓門戶愁淪落我聞其言心暗傷  
造物何者天茫茫直道何辜每摧折清門往往遭不祥  
君家幸免北寺獄脫身灑澗登康莊枯木終然少春氣  
孽禽不得冲天翔窮途豈得無慟哭舌在還須重激昂  
男兒回天與轉日不愁失路愁無骨寒門須枉燭龍光  
牛鐸亦應黃鍾律龍劍應知有合弁楚弓何足論得失  
向平五嶽遊須返曾參三釜孝誰及陸生陸生勿復悲  
如君才調真龍媒追風躡電時當來伏櫪偃蹇何爲哉  
與爾同上初陽臺捫天摘月傾百杯

橘香菴訪同岑和上

君昔同我舅訪我來天平新詩灑蘭雪披誦澈骨清爾  
後聞君買山住十年夢挂金庭樹金庭杳絕愁難攀有  
足忽墮紅塵間西經鴈門塞北上軍都關走馬擊劔何  
翩翩舉頭猿鶴非故山驚風吹人返鄉國相訪禪關不  
相識愧我蒼顏對鶴孤憐君峻骨依松直怪底結菴名  
橘香繞菴種橘如人長梅花欲落未落際一天空翠沾  
衣裳百年世事風中蝶幻海茫茫不可涉蓬萊方壺衣  
帶間啖名何勇逃名怯歸休乎山之隅道林惠遠真吾  
徒沈冥賴有吾舅俱扁舟移家越重湖掘芝拾橡墮猿

徂同公同公肯許無分泉一曲雲一區

香花甲詩

山人自詠香花甲逢人便說香花奇芬芳入口沁心肺  
根爲上藥補清羸終朝采采不盈掬嬾割綠雲烹肉芝  
此花此甲人莫識錫以嘉名隱君得孤叢不向別溪生  
分餉惟供老僧食吾聞仙山富靈草藥苗滿地無人曉  
神農圖經載常味葛洪孫逸空探討吾欲餐千葉之蓮  
玉井迢遙不可攀菖蒲九節以爲杖天壇高高不可上  
豈如從子香花廬長鏡短杓春雨餘漉汁當茗飲削根  
供朝餽此味休爲世人道肉食紛紛更相笑

喜雨二首

萬方憂旱日一雨快滂沱誰挽銀河水平添震澤波漑  
田秋未晚潤物夜偏多辛苦吳農甚千村此笑歌  
莫是烹羊得將無喫酒爲長貧思歲熟多難荷天慈生  
意歸庭樹涼風動鬢絲溪橋新漲足倚杖看多時

再疊前韻二首

溽雨何滂沛蘭風故淡沱情龍驚絕壑嬌燕掠蒼波羽  
士誇功最郡縣多延術士禱雨山田較澤多吾無南畝入失喜亦

長歌

信有豐年在疇能樂事爲易求天帝澤難得長官慈物

色嗟星鬢風謠歎繭絲何當同野老擊壤太平時

贈沈行可

平世爲儒亂卽休藏名藥市幾春秋粵裝不置千金產  
茗泛仍披五月裘水蛭方除仙有路用陶弘景事芻人針罷

鬼無愁

用徐秋夫事

宿疴已是逢君起

漆葉青黏擬更求

元日分韻

元日能高會青門一草亭春浮栢葉盞天濶少微星  
倚曲簫聲脆緜書燭燼零春光九十日日日莫教醒

善病文園客蓬門隔歲緘天涯一杯酒悵望不同銜  
嬾對青綾被長懷白木鏡無由理歸棹采藥就西巖

送陳廣陵下第南歸

南威容顏天下希，阿母譽之旁人疑。不如養著深閨裏，  
一朝嫁作君王妃。陳郎才華秀南國，金門射策排風翼。  
所親衡文翻放歸，坐上知交皆歎息。我酌一卮獨賀君，  
丈夫高冠須切雲，白璧不受蒼蠅點。濯纓滄海辭塵氛，  
薄俗紛紜競口語。君若掄魁轉難處，信是無私第五倫。  
東封得力誰寬汝，何似龍泉暫掩鉉。依然好手解穿楊，  
他年自奏天人草。特達珪璋貢玉堂。

送顧雨若南歸

我昔締交過吳門，二顧於我情特厚。同時往還有諸子，

惠吳黃翁稱好友夜繙書史恒連牀朝訪林泉每攜手  
轉遂無根自南北會面一二別八九今年都下逢小顧  
喜愕萬端無不有君也才華舊軼羣懸藜之璞已遭剖  
一朝微文忽相中退飛六鷁差遲久虺頽天馬頓長纓  
變幻垂楊生左肘羹污朝衣未許漚劍封緘匪徒勞吼  
惠生作客亦在茲相逢爲君一頓首君今歸去何所作  
堯峰之陰占十畝長懷萬頃蠶胸懷細掃松花釀春酒  
世事悠悠寧足論君舌雖存幸緘口男兒生世貴適意  
笑殺蕭朱誇結綬看君仲氏官禁林索米長安只空甔  
歸去門庭可羅雀通顯如斯復奚取我本江湖一散人



誤落紅塵魚在釣便思拔脚還故山從君卜鄰種菘韭  
因聲寄訊諸同學道余相憶平安否

壽劉太恭人

忝爲師門士夙聞大母賢母年二十四栢舟涕漣漣  
前有兩孤郭外無寸田十指出布粟畫灰授殘編嚴切  
過恒情慈極使之然并蜂相辛螫豆箕自烹煎吞聲忍  
難忍滴淚穿重泉天行久回復鳳雛兩翩躚或徊翔丹  
山或騰凌紫煙家聲始一振破顏寒燈前譬如老舟師  
振柁出洄漩危險飽經涉及今履通川又如古松根屹  
立冰霜天坐待陽春回枝葉重鮮妍天心立人極使母

吏顛連以誨爲人毋勗彼砥節堅節苦報亦厚晚獲爲  
良田母年垂七袞師位槐棘邊非祿正無疆頌禱諒難  
宣歌詩布彤管垂輝百千年

城渠開

臨安城中十萬戶泉源蓄洩渠一縷何年梗塞半爲土  
深不容刀淺如釜血脉旣以枯咽喉鬱不吐煩蒸偏側  
奈何許火災數起疾病多使我民兮苦復苦車軒軒中  
丞來中丞來河當開教令一朝下動地懼如雷千夫畚  
萬夫鍤波鱗鱗泥獵獵疏渠之淤濬渠狹雲揮電霍不  
停聽二百年來沙礫場方舟連筏流湯湯役徒百萬不

費民間一斗粟中丞經略誠非常君不見白公堤李公  
井一時功績千秋永嘉名更有趙公渠誰能補入河渠  
書

捍海塘

築塘誰湯信國開國元戎秉成畫約東海若磨天吳長  
隄如城捍潮汐修塘誰趙中丞經天緯地帝股肱頽防  
崩岸悉築塞不許蛟鯨橫憑陵越民食海亦苦海寇賊  
風濤時一駭只今萬里不揚波障田况有茲塘在我耕  
我耜我稼我禾鳴雞吹狗煙火桑麻無風魚災不見兵  
戈綢繆桑杜功如何海如杯山如螺中丞烈不可磨

營無遺

長刀垂腰臂蒼鶻走入民家氣咆勃婦女蒼黃男股栗  
問此誰何索逋卒營中舉債誠大難一母十子何能完  
賣兒典女苦不足坐令平民骨髓乾中心念之中心酸  
顧謂吾民渴不飲毒非饑不啖漏脯營中有債慎勿舉  
顧謂汝卒汝爲天子守邊將軍號令嚴如山汝蝥吾民  
不汝赦憐以汝券來汝無苦民貧莫償吾償汝出金於  
府焚券於庭自今兵與民各牧爾牧耕爾耕脫復出入  
債時則有大刑霜稜稜日杲杲街頭懼喜營中惱寄言  
營中勿多惱天子聖明汝行當念公祝誦不可了

縛市虎

山中有虎白額爛斑磨牙擇肉耽耽草間市中有虎不翼而飛無畫無夜搏人以肥山虎尚可市虎殺我一虎十張動輒構禍白日當天心百怪宜潛藏至仁雖解網肯令虎陸梁爪牙豈不利虞羅已高張搖尾寧得免磔裂謝豕羊一虎去一市喜百虎除百市理騶虞來遊鳳來止甘雨祥風樂甫始

呈理安和尚

坐斷東吳八九峰還來祖席聞宗風醫王應病藥隨手老將行邊兵在胸澗路撥開雲片白海門迸出日輪紅

蘇來一喝如雷震，贏得千山盡耳聾。

贈廣督吳伯成四首

經文緯武世誰倫，一代人龍使相尊。  
擡筆萬言吞夢澤，揮戈半夜渡崑崙。  
天心苦丹楓識，平海功高鐵券論。  
最是吳儂懷舊蔭，春移黍谷至今溫。

象郡羊城過劫灰，拊循端仗出羣材。  
神針剖理夢絲亂，上藥調和元氣迴。  
人祝華阜廿年住，帝知趙抃一琴來。  
處膏不潤人誰信，獨酌廉泉水半杯。

脂車縞素常存念，舊衷窮天下無折節。  
何曾遺瑣賤，推心從不計榮枯。  
脫驂訟及黃蠶客，謂及山人掛劍恩深萬

帷孤

謂葉淵發世

踏荒涼交誼絕憑畱一綫在天隅

授簡追陪憶往年月泉社裏壁霞箋書生濫踏八磚地  
開府真搆半壁天剩有芒鞋攀落鴈慚無綵筆頌凌煙  
羅浮八月花如海乞取龍葱步絕巔

鎮海樓歌

羊城山脉羅浮來龍蟠虎躍何雄哉頓落平岡起越秀  
川原如掌當陽開重城迢迢跨山嶺更有魏樓壓城頂  
望若瓊臺湧半空坐疑蓬闕凌倒景一層兩層城市明  
三層四層遙山平五層舉日見大海煙沙島嶼紛縱橫  
天下魏樓數黃鶴齊名古有滕王閣茲樓壯麗乃過之

恨在天南見者稀却憶永嘉平粵時橫江跨海屯熊羆  
怪此嶺南多反側趙佗劉龔肩相隨孫恩盧循足流輩  
樂禍走險甘如飴規天度地收形勢冠山爲樓銷霸氣  
鎮海標名非偶然韓公繼築同深意竭來傾圮數十年  
蠻爭觸鬪常騷然英英李公秉節鉞淨掃嶺嶠無烽煙  
重築茲樓萬民喜銷兵偃燧從此始朝漢臺邊望五雲  
歲歲昇平祝天子

翠琅上人見贈墨竹詩以酬之

世間萬物竹難寫不恨纖柔卽粗野翠公道價重蘭若  
翰墨餘習猶未捨貽我琅玕翠盈把筆墨不在朱歸下



朱白民歸文休近代墨竹能手龍筋鶴骨相低亞  
生態淋漓韻蕭灑涼風騷騷寒雨瀉  
對之可以消長夏蠻村墨妙知者寡  
報以一硯銅雀瓦請公更賦竹尊者

贈江右宋牧仲中丞

古來文人把節鉞燕公代公兩人傑  
東川節度高達夫後來使相范石湖  
文章勲業兩兼擅問代英賢今則無  
宋公矯矯丹山鳳連天門闕韋平重  
早歲才名叶夢花一篇落紙千人誦  
清郎數歷何翩翩三張二陸無當前  
西山秀句珠出海嶺江健筆鵬摩天  
誰攬春華復秋實惟公政事材無匹  
武庫當陽開濟弘流錢平叔經綸密

雲司水部譽精敏馮翊扶風頌畫一東國祥刑平若水  
南藩治職溫于日宵衣聖人思太平得數大吏天下清  
公望公才深簡注命公開府章江行豫章自昔稱樂國  
兵燹凋殘足荆棘佇看摩拊起瘡痍已見笑談消反側  
江山奇麗攀帷中彭湖一鏡涵鴻濛五老簾泉落几案  
金精閣皂羅屏風涪翁詩格尊此土劉崧楊奇以還無  
足數中原大雅流天聲七澤魚龍皆起舞東吳散人海  
鶴羣往年屢蹋春陵門驚弦鍛翮九天墜江湖放蕩無  
冬春去冬偶夢羅浮好瘴嶺千重恣幽討今秋復憶尊  
羹鮮一篙新漲浮江船江船咫尺瞻旌纛掣鈴暫欲攄

離抱敢同才子賦滕王且學叅軍嘲落帽

贈李茲佩

扶風弟子幾人存獨有康成德望尊

茲佩爲先  
子門人

談笑每

驚鋒破的傳經常見屢盈門天將晚穫酬良耜春作高  
花覆古根濶俗不知稽古貴憑君大雅與扶輪

哭周青士三首

避世常高臥衰年翻遠游虛霑楚庭醴不返剡溪舟逸  
興雲中鶴忘機海上鷗斯人不重見長水卽西州  
情好同昆弟盟言矢笠笠未曾分薄俸有愧作良朋宿  
草悲何及遺篇篋或能諸孤猶葛屐執手淚填膺

命爲工詩蹇家緣好客貧布衣然諾重淡水性情真劉  
蛻元奇士黔婁是達人故應無病逝胸次絕纖塵

上巳日集周覲侯齋作

具區爲曲水扁舟爲流觴往來三萬六千頃如此修穉  
非尋常晚來樂饑更何所周郎山齋桂奇古樓高俯抱  
衆峰青湖邊纖纖月初吐雷驚紫輦出地肥竹根新笋  
剝雪衣洞庭春醪桂凝露觥籌無算縱橫飛眼前舊好  
兼新歡佳辰良會難復難華林金谷今何在槐根王侯  
夢未殘徑欲移家傍林屋君倡我酬效皮陸春和日日  
堪採蘭秋美家家好看菊

資福寺訪天日禪師

深谷精藍畫寂然一塵不到法幢邊  
香來隔澗知蘭畹陰覆諸峰見竹  
天地暖秋庭多嫩萼人清晚浴亦名  
泉閒身况值佳風日隨處繩牀自在  
眠

題瑪瑙山房圖

萬條楊柳搖春空一堤桃花蒸日紅  
隔水禪林鬱蒼翠新篁老樹森蒙籠  
澄波迴環徑路絕褰裳欲往愁難通  
茅堂踈迥狎鷗鳥梵侶寂靜鏗魚鐘  
輕帆影拂簷際白遠山翠壓林端濃  
杖藜負手者誰子得非支許尋高蹤  
日迎飛雲送歸鴻虎溪三笑將無同  
試問勞勞塵土客

那得如此神從客近來書手毛君工清曠宛有前賢風  
能以人區作靈壘海懷霞想看無窮乞君更寫洞庭月  
畫我獨立縹緲之孤峰

寄翁樵仙

莫陋辰陽在百蠻宋均遺愛著人間刀耕應念山田瘠  
飛輓須知驛路艱禮教自能祛俗陋仁風端可革民頑  
政成報最無餘事秘簡還探二酉山

九日侍澗上先生登照山作

木落潭影空秋山淨當牖蠟屐復囊萸相將作重九眷  
言懷吾師衰遲多病後索莫對黃花可無一尊酒挈榼

遠相存借我同門友一笑慰老懷百愁掃如帚看碑金  
薤披展畫煙雲走雅詠間清言觴行無停手忽然念登  
高發興未曾有扶輿弟子職逶迤陟岡阜羅坐得平坡  
臨眺日未酉歸雲緜遙山川原劃而剖皓月生東溟垂  
垂可攬取樂飲欲忘歸洗盞盡數斗戲馬與龍山得有  
此樂否吾師土室臥禁足廿年久乘輿聊一出異事詫  
童叟吾曹所欣幸靈光餘一叟意氣老不衰可卜期頤  
壽謝傳光東山羊公名峴首茲山雖一丘佳名當不朽  
年年捧杖來心期庶無負

徐健菴司寇以一葉舟見訪溪南感而有作

授簡飛觴記往年碧山無日不畱連雲霄久絕攀嵒望  
羅幃仍餘訪戴船世上紛紜焦鹿夢林間空濶海鷗天  
五湖倘遂扁舟興一笠相將雲水邊

哭益都相公十首

本朝相業孰如公直道清裁水鏡同廓落胸懷涵萬品  
鴻鈞潛轉不言中

三陲撻伐用天戈廟算神謨密贊多剛到太平無事日  
乞身歸去勇無過

祖餞傾都羨若仙十年瀟灑臥平泉潞尚繫蒼生望  
愁見台星折九天



遺奏驚從邸報看，騎箕雲路杳漫漫。  
懸知朝野都悲愴，我更臨風淚不乾。

平津門下多奇士，寵遇偏蒙及下材。  
題就新詩長遣和，遊當佳日每教陪。

萬柳堂前柳拂鞭，長椿寺裏月橫天。  
擘牋微笑風流在，一度追思一泫然。

鍛羽飄飄落彈秋，遠蒙手札慰牢愁。  
師恩欲報知何地，獨抱殘編老故丘。

曾造鄉園進壽卮，佳山杖履步遲遲。  
那知一隔扶風帳，無復彭宣再見時。

心契禪宗證道真裴休楊億後先身大慈不忘人間世  
垂手重來轉願輪

吳會青齊鳥路長未能漬酒拜靈牀感恩懷舊無窮思  
迸入哀詞淚萬行

白鹿洞贈于淑掌

廬山白鹿洞名勝天下聞先賢開講堂規條千載存吾  
祖昔典郡雅化如春溫適當廢院後生徒散如雲喟然  
議興復廟貌爲更新歸田七百畝籍重羅陳此事載  
家乘歲遠迹恐湮嘗思泛鄱陽故事詢遺民邂逅于  
子才高而學醇世爲書院士父作都講尊洞志出相示

先公有遺文復院具始末大書揭貞珉盛烈幸不磨欣  
慰安可論聖學久蕪沒淡薄陋儒門鹿洞留一絃弦誦  
猶說譔英才見吾子已作觀國賓勉哉崇實學加膏而  
沃根歸時告父老賢守今有孫他年當過此拂碑薦芳  
蓀

送鈕玉樵之官高明

掩關衡茅中除日久不視東鄰聞拜官西舍報除吏問  
其來何從入貴非一例軒軒市井兒捐富而得貴謁客  
盛輿斯薰灼名得意玉樵大雅材小艇僮自刺促膝猶  
素心劇談無俗事但索端紫觀摩掌久不置嶺表多奇

珍犀象與珠翠君胡獨賞此嗜好與俗異無怪諸親朋  
笑君不解仕三仕猶空囊不爲兒孫地知君松筠心老  
大益堅厲不貪素所寶肯以厭貧棄不見前令君巧賈  
十倍利宦成身不歸家肥亦奚濟吾不善祝君多金而  
高位但願保令名玉雪無點翳寧爲濯纓清莫學補糟  
醉養心勝藥餌寡欲祛癘癘稍辦三徑資好作菟裘計  
滿載輿頌歸清白可傳世掃榻仍候君烹葵有真味

贈紹興郡守王憲尹四首

江東人物盛瑯琊秀出如君世更誇內史風流映蘭雪  
領軍才度冠朝霞清通物望推三省婉雅詩名擅一家

政事文章能竝美  
宣風好擁畫輪車

會稽山水畫屏開  
天與詞人染翰材  
領郡只如修稷至  
放衙長似看山來  
人因乞扎頻擗牘  
僧爲遊詩屢拂苔  
修竹清湍君故物  
雙旌魚鳥不驚猜

當年藜閣共緡書  
囊筆含香樂有餘  
嬾散我甘鋤菜老  
飛騰君正擁旄初  
賢侯不廢登山屐  
倦客聊停下澤車  
話舊班荆情不淺  
湘蕙風味勝鱸魚

千巖萬壑夢常遊  
此日眞乘雪夜舟  
野鶴近人還有待  
孤雲於世復何求  
青鞋合向雲門試  
竹杖聊爲禹穴留  
乞取庫中箋百幅  
與君徧寫鏡湖秋

題龐雪崖種竹圖

秀削者君之體骨淡逸者君之風神節之高不傍一物  
性之澁不受一塵常儵然其子立惟與竹乎相親不改  
柯而易葉洵無心而有筠竹肖君之貌君得竹之神君  
乎竹乎孰主孰賓吾將問諸離言之人

酬陳霖山

栗里遺民去不還剛逢一老水雲間著書富欲追繁露  
琢句清堪步小山世味淡時堅道骨機心盡後駐蒼顏  
五君向秀須參預不共山王一例刪

題王石谷還山圖二首

天府裁頒瑪瑙盤忽隨新鴈出長安大癡粉本家山在  
筆底何如杖底看

詞客何妨作畫師藍田丘壑愛棲遲池頭右相傳呼日  
可抵山牕潑墨時